



ZARAUZKO UDALA

## ELKARTEEN UDAL ERREGISTROAREN ERREGELAMENDU ARAUTZAILEA

### ZIOEN AZALPENA

Zarauzko Udalak hainbat laguntza mota eman izan dizkie udalerrian lan egiten duten irabazi-asmorik gabeko elkarteei. Elkarteek, gainera, Udalarekin batera lan egin dute udal jarduera batzuetan.

Elkarte horiekin izandako harremani esker, elkarteek, kasu batzuetan, merezimenduak egin dituzte udal interesekotzat hartuak izateko. Hala ere, ez dago izaera horren aitortza formalik, ezta elkarte horietako bakoitzaren ezagutza frogagarrikerik ere.

Bestalde, azkenaldian onartutako hainbat foru xedapenek adierazten dute zenbait onura fiskal eta zergazkoak aitortzeko beharrezkoa dela erakundeak alde aurretik Udal Intereseko Elkartearen berariazko adierazpena edukitzea.

Horiek horrela, Elkarte Udal Erregistroa sortu da, herrian dauden elkarten adierazpena egiteko eta informazioa emateko tresna gisa.

Azkenik, erregistro horrek honako xedapenetan adierazitako izaera eta helburuak izango ditu: 2568/1986 Errege Dekretuak, azaroaren 28koak, Toki-korporazioen Antolamendu, Funtzionamendu eta Araubide Juridikoaren Erregelamendua onartzen duenak, 232 artikuluan eta segidakoetan adierazitakoak.

#### Lehenengoa

Elkarte Udal Erregistroa sortzen da. Hor jasoko dira hirugarren puntuan azaltzen diren datuak.

#### Bigarrena

Irabazi-asmorik gabeko elkarteek eskatu ahalko dute erregistroan inskribatzea, baldin behar bezala inskribatuta badaude Eusko Jaurlaritzaren Justizia Saileko Elkarte Udal Erregistroan eta euren jarduerak udalerrian egiten badituzte.

#### Hirugarrena

Interesa duten elkarteek Udalaren Erregistro Orokorrean aurkeztuko dute inskripzioaren eskaera, dokumentazio honekin batera:

##### 3.1. Elkarte Udal Erregistroan inskribatzeko:

- IFKren fotokopia.
- Elkartearen estatutuen fotokopia.
- Eusko Jaurlaritzaren Elkarte Udal Erregistroko inskripzioaren frogagiri eguneratua.
- Zuzendaritzako pertsonen izen osoak.

- Elkartearen bazkide kopurua.
- Elkartearen urteko aurrekontua.
- Banketxeko kontu-zenbakia (elkartearena).
- Udalarekin harremana zein hizkuntzatan izan nahi duen.

### 3.2. Gainera udal intereseko elkartearen adierazpena eskatzen bada:

- Zerbitzu eta jardueren memoria (azken hiru urteetako), udal interesekoa dela frogatzen duena.
- Jarduera ez dela era profesionalean eta jarraituan egiten frogatzeko memoria.
- Zinpeko aitortea, egiaztatzen duena, elkartearen ez dela egiten sexuaren, ideologiaren, jaioterriaren, nazionalitatearen edo sexu-joeraren ziozko diskriminaziorik, ez aukeratzeko prozesuan ezta lan-jardunean ere.
- Delitu sexualen ziurtagiria, lege hauetan aurreikusitakoa, baldin elkartearen behartuta bada: 1/1996 Lege Organikoa, Adingabeen Babes Juridikoari buruzkoa (26/2015 Legeak aldatutakoa) eta 45/2015 Legea, boluntariotzari buruzkoa.
- Hirugarren Sektore Sozialeko Elkartearen Eusko Jaurlaritzako Erregistroan izena emanda dagoela frogatzeko agiria, maiatzaren 12ko 6/2016 Legea, Euskadiko Hirugarren Sektore Sozialari buruzkoa aplikatu beharreko kasuetan.

## Laugarrena

### 4.1. Inskripzioa bakarrik egin nahi bada:

Datu guztiak frogatu ondoren, dagokion departamentuak Udaleko Idazkaritzara bidaliko du espedientea.

### 4.2. Gainera udal intereseko elkartearen adierazpena eskatzen bada:

Aurkeztutako memorian deskribatutako jardueren izaerari eta emaitzei buruzko txostena egingo du dagokion departamentuak. Ondoren udal intereseko elkarte gisa inskribatzeko edo ez inskribatzeko proposamena egingo da, eta Kontu-hartzaitza departamentura bidaliko da espedientea.

Dagokion departamentuak Udaleko Idazkaritzara bidaliko du espedientea, dagokion informazio-batzordearen aldeko irizpenarekin batera.

## Bosgarrena

Alkatetzaren dekretu bidez erabakiko da Elkartearen Udalen Erregistroko inskripzioa (baina horrek ez dakar berekin Udalen Intereseko Elkartearen adierazpena).

Udal intereseko elkartearen adierazpena, berriz, Udalbatzarrak onartuko du.

## Seigarrena

Idazkaritza Nagusia egongo da Elkartearen Udalen Erregistroaren kargu, eta bere departamentua arduratuko da inskripzio-eskaeraz.

### Zazpigarrena

Erregistroko inskripzioa ezeztatu ahalko da, pentsatzen bada jarduerok Udalarekiko lankidetzaren aurkakoak direla. Ezeztatze hori arrazoitu egingo da, eta entzunaldiaren tramitea emango da horretarako irekitako espedientean.

### Zortzigarrena

Iskribatutako elkarte arduratuko da inskripzioaren elementuetan gertatutako edozein aldaketa jakinarazteaz.

### Bederatzigarrena

Udal intereseko adierazpena daukaten elkarteek urriaren 28ko 6/1997 Foru Arauan jasotako onura fiskalak eta beste edozein onura fiskal izango dituzte, baldin araudi horretako betebeharrak betetzen badituzte (6/1997 Foru Arauak 1/1993 Foru Dekretu Arauemailea, apirilaren 20koa, Jarduera Ekonomikoen gaineko Zergaren Testu Bategina onartzen duena aldatu zuen).

Era berean, Udalak dituen eta zergazkoak ez diren beste onura batzuk ere izango dituzte elkarteek.

### Azken Xedapena

Sortutako Erregistroak honako hauetan aitortutako araubide eta helburuak izango ditu, harik eta Udal Erregelamendu Organikoan edo, halakorik balego, Elkarteen Erregelamenduan arautzen ez den bitartean: 2568/1986 Errege Dekretua, azaroaren 28koa, Toki-erakundeen Antolamendu, Funtzionamendu eta Araubide Juridikoaren Erregelamendua onartzen duena (232, 233, 234, 235 eta 236 artikulua).